

AWOL

a screenplay storyline by Elsie C. Albis

Logline

Ito ay kuwento ng pagsasama nina MAYA (early 20s at present), isang guro, at ANGELO (mid 20s), sundalo, bilang magkasintahan at mag-asawa. Susubukin ng pagkakataon ang kanilang pag-iibigan. Manatili kayang buhay ang pangako nila sa bawat isa? Malagpasan kaya nila ang mga pagsubok sa kabila ng tukso, patayan, at pandemya sa bansa?

Storyline

(2018)

Nakilala ni MAYA si ANGELO nang nasa kolehiyo pa lamang siya. 4th year educ major siya noon; corporal army naman si ANGELO na na-assign sa kanilang bayan. Habang pauwi si MAYA galing eskwelahan, nakita niyang kumakain ang apat na sundalong pinaglalaruan ang atlas moth na nakadapo sa poste ng karenderya sa may jeepney terminal. Pinagsabihan ni MAYA ang apat na sundalo na ‘wag itong pagtripan at baka isa ito sa mga mahal nila sa buhay. Pinagtawanan si MAYA ng mga kalalakihan maliban kay GELO na nagustuhan agad ang dalaga. Gayundin naman si MAYA na nagwapuhan rin sa binata. Makalipas ang ilang lingo, laking gulat ni MAYA nang makita si GELO sa harap ng kanilang paaralan. Nagpakilala ito, niyaya siyang kumain sa karenderya, at hinatid siya sa terminal. Hiningi naman ni MAYA ang cellphone number ng binata bago sila magkahiwalay. Halos oras-oras silang magkausap sa text simula noon.

Kapag walang duty, bumibisita si GELO sa bahay nila MAYA. Unica hija ito ng kapitan ng kanilang barangay. Teacher ang nanay ni MAYA. Kapag bumibisita si GELO, dinadalhan niya ng mga pagkain mula sa bukid ang mga ito at pinagluluto. Naging official couple sila nun’ng birthday ni GELO, tatlong buwan mula nang una silang magkakilala. Dahil na rin sa busy ang mga magulang ni MAYA, naging malaya si GELO na yayaing mag-sex si MAYA ng araw na ‘yon. Virgin nu’n si MAYA. Tuwang-tuwa ang binata ng malaman niya na siya ang nauna. Proud na proud naman si MAYA sa kanyang birthday gift.

(2019)

Nang nakapagtapos si MAYA, nag-celebrate ang dalawa sa isang beach resort. Naligo sila, kumain, naglakad-lakad sa pampang, at nag-sex sa kanilang hotel. Napag-alaman din ni MAYA na kaya di siya naipapakilala sa mga magulang ni GELO dahil pinaampon pala ito. Di na nito

nakilala pa ang kanyang tunay na mga magulang. Matagal na rin lumayo si GELO sa mga umampon sa kanya na di naman siya tinuring na tunay na anak. Nangako ang dalawa na bubuo ng isang matatag na pamilya. Nang mag-umaga, naisipan ni MAYA na buksan ang cellphone ni GELO. Laking gulat niya nang makitang may mga katext ito. Nag-away ang dalawa. Umuwi sila nang di nag-uusap. Bumalik sa duty si GELO nang di pinapansin ni MAYA.

Isang buwang matapos ang outing, nakaramdam ng sakit sa tiyan si MAYA. Nilapitan ng kanyang pamilya ang halos lahat ng mga albularyo sa kanilang barangay. Ang sabi ay nakulam daw ito. Baka raw pinakulam si MAYA ng mga babae ni GELO, o kaya naman ng kanyang mga binagsak na estudyante. Akala naman ni MAYA, buntis siya. Ikinatakot niya ito kaya di rin niya naisip na magpahospital kahit negative naman siya sa PT.

Sa loob ng limang buwang, tiniis ni MAYA ang sakit ng tiyan at ang paglaki nito. Ikinabahala niya rin ang halos tatlong buwan na walang kontak kay GELO na na-assign sa ibang bayan na walang signal. Aminado siyang na-miss niya ito. Nabalitaan niya ring nasawi sa engkwentro ang isa sa mga kaibigan ni GELO sa trabaho. Ikakasal pa naman sana ito. Dahil sa walang kontak si MAYA kay GELO, nahulog ang loob nito sa isa niyang estudyante sa kolehiyo na si JANUS na halos kaedad niya lang (early 20s). Nang una, dinadaan-daan lang ni MAYA sa biro ang pagkagusto sa estudyante, na 'wag na ito mag-exam, ipi-PM niya na lang sa fb ang requirement nito. Wala sa kamalayan ni MAYA na paunti-unti, nahuhulog ang loob niya sa binata. In-add ni JANUS si MAYA sa facebook, at du'n sila nagsimulang mag-usap. Halos umaabot na ng madaling araw ang kanilang pagcha-chat. Sa loob naman ng klase, kahit gaano pinipigilan ni MAYA, halatang kinikilig ito sa presensya ng binata.

Nang binisita siya ni GELO, napawi na ang galit ni MAYA sa kanya. Ikinagulat naman ni GELO ang kanyang pinagdadaanan. Pinilit siya ni GELO na magpakonsulta na sa doctor. Bagaman ayaw ng mga magulang ni MAYA, dahil baka raw lumala ang kalagayan ng dalaga, dinala pa rin ito ni GELO sa ospital. Napag-alaman na may ovarian cyst si MAYA. Sabi ng kanyang mga magulang, epekto na raw ito ng kulam. Balak pa sanang ipatingin sa mga albularyo ngunit idiniin ni GELO na hayaan na lamang ang mga doctor ang gumamot sa dalaga. Agad, pinaoperahan si MAYA. Natanggal ang cyst ngunit nadamay pati na ang isa niyang ovary. Dinalaw si MAYA ng kanyang mga estudyanteng lalaki kasama na si JANUS at ang mga kaibigan nito. Mapapansin dito ang mga kakaibang titigan nila MAYA at JANUS. Napansin ito ni GELO.

Nang makalabas na sa ospital, sa kwarto ni MAYA, nag-sex ang dalawa kahit na operada pa si MAYA. Di man ginusto ni MAYA, di siya makatanggi dahil aalis na naman si GELO. Ayaw niya itong maghanap ng ibang babae. Iniisip niya na lamang si JANUS habang nagsesex sila. Pagkatapos nilang mag-sex, niyaya ni GELO ng kasal si MAYA. Ginamit niyang dahilan na isa na lamang ang ovary ni MAYA kaya baka di na ito magkaanak. Nagdalawang isip si MAYA, ngunit sinuguro niya kay GELO na mahal na mahal niya ito. Nagalit si GELO. Tinanong siya nito kung bakit di siya agad pumayag. Sabi ni MAYA, aalagaan niya muna ang kalusugan niya, at di pa rin siya tuluyang nakaka-move on sa mga katext ni GELO. Pinagtawanan siya ni GELO. Sinabi nitong nabasa niya ang pag-uusap nina MAYA at ng kanyang estudyante. Pabiro man ang mga "I love yous" nila sa chat, batid raw ni GELO na mali 'yun at may halong katotohanan. Di makakibo

si MAYA. Ini-insist ni MAYA na joke lang talaga ang mga endearments nila ng kanyang estudyante. Nangyari lang din daw ito dahil wala si GELO sa mga panahong kailangan siya ni MAYA, si JANUS ang nakapagbigay sa kanya ng kilig. Di na nagalit pa si GELO. Alam niyang may pagkukulang pa siya, dahil sa loob ng mga nakaraang buwan na wala siya, nakakuha siya ng tulo sa kakapunta niya sa bahay-aliwan na malapit sa kanilang kampo. Bumalik siya nang tuluyan na siyang gumaling. Pagkatapos ng sagutan, napagdesisyonan ng dalawa na magpakasal at magiging tapat na sa bawat isa.

Nasaktan si JANUS nang malamang kinasal na si MAYA. Ngunit di ito lumayo, patuloy pa rin ito sa pakikipag-chat sa kanyang dating teacher. Nang wala si GELO, niyaya ni JANUS si MAYA na kaumain sa labas. Closure daw nila ito. May trabaho na si JANUS kaya gusto niyang i-treat si MAYA for the last time bago ito lumayo for good. May babae na rin daw siyang nagugustuhan, mabait daw ito at artistahin. Nang makita ni MAYA ang mukha ng babae sa facebook, sumang-ayon naman siya. Sa katunayan, na-insecure siya sa kasexyhan nito. Sa pag-uusap ng dalawa sa restaurant, niyaya ni JANUS si MAYA na tingnan ang apartment niya na malapit lang sa kinainan nila. Ipapa-check lang raw niya ang kanyang resume. Di niya raw kasi nadala ang laptop. Nandun daw naka-save. Alam naman ni MAYA na pwede siyang tumanggi, dahil pwede naman i-send sa fb ang resume pero pumayag pa rin siya. May nakita silang itim na pusa sa daan na kinatakot ni MAYA. Sa apartment, di na napigilan ng dalawa ang bugso ng kanilang damdamin. Dahil na rin sa may feelings talaga si MAYA kay JANUS, nakipag-sex siya dito. Habang nagsesex ang dalawa, tumawag ang nanay ni MAYA. Pumunta sa kusina si MAYA para kausapin ang kanyang nanay. Nakita niyang nakalatag ang mga pinagbabawal na gamot sa isang maliit na mesa sa kusina. Binalita ng nanay niya na namatay ang dalawa pang kaibigan ni GELO sa ambush. Abay pa naman ang mga ito noong kinasal sila. Umalis si MAYA sa apartment ni JANUS. Nag-thank you ito at tinapon sa kama ang isang plastic ng shabu na nakuha niya sa kusina. Sinabing kalimutan na nila ang isa't isa. Dumaing si JANUS, nagpaliwanag sa kanyang bisyo, umiyak, naging violent, ngunit pinaliwanag ni MAYA na may asawa na siya at di niya kayang magdagdag pa ng isang alalahanin. Ayusin raw muna nito ang sarili. Niyakap siya ni MAYA saka iniwan. Humagulhol si JANUS at nagwala na sinabayan ng mga ungol ng mga aso.

Pasko. Binalita ni MAYA na buntis siya. Pinakiusapan niya si GELO na iwan na nito ang trabaho, na maging full-time husband at ama na lamang. Gusto na rin ni MAYA na kalimutan si JANUS na magagawa niya lamang kung nariyan si GELO. Sinubukan ni MAYA na kumbinsihin ang asawa na manatili na lamang sa bahay at pagkakasyahin raw nila ang sinasahod niya bilang college teacher sa isang state university. Nangako naman si GELO na aalis na ito bago manganak si MAYA. Sigurado raw ito dahil pagod na rin ito sa katiwalaan sa kanyang trabaho. Nabanggit nito kay MAYA na kung di siya ang mapapatay sa trabaho, baka raw siya ang makapatay ng katrabaho dahil sa mga kasakiman ng mga ito. Umasa si MAYA na makikinig ang asawa sa kanya at sa sarili nitong mga hinaing.

2020

Nagkaroon ng pandemya. Kinailangan ni GELO na mag-duty sa border checkpoint ng kanilang probinsya. Kinontra nang kinontra ni MAYA ang asawa na mag-duty pa dahil na rin sa risk ng virus at sa dumaraming kaso ng mga army na pinapatay kung hindi ng mga pulis, ng mga “rebelde”. Walang tigil na iginigiit ni MAYA na umalis na ang asawa sa trabaho nito. Binanggit ni MAYA ang mga nakikita niyang itim na pusa, ang amoy ng kandila at mga mabalsamong bulaklak sa kanilang bahay na senyales na may mamamatay.

Ngunit nagpumilit si GELO na magduty. Umalis pa rin ito. Aniya, kailangan niya pang makaipon para na rin sa panganganak ng asawa. Labag man sa kanyang kalooban, nagpaiwan si MAYA sa kanilang bahay kasama ang kanyang nanay. Sa mga panahong ito, na-miss niyang kausap si JANUS, ngunit pinigilan niya ang kanyang sarili. Ginugol niya ang kanyang oras sa online classes, at sa pag-alaga ng kanyang sarili. Matagumpay rin niyang di na kinausap pa si JANUS na pilit pa rin siyang kinokontak. Lumaki nang lumaki ang tiyan ni MAYA, di na rin makauwi si GELO dahil sa risk ng virus, hanggang sa nanganak siya sa ospital.

Habang akap ang kanyang malusog na sanggol, hinanap niya si GELO. Ngunit ayon sa magulang, naghatid daw ito ng relief sa malayong lugar kaya di nila makontak dahil walang signal roon. At bawal din raw ang maraming bantay kaya kahit andyan si GELO, di rin daw makakapasok ng ospital dahil isa lang raw ang pwedeng bantay.

Pakauwi ng bahay, bumungad kay MAYA ang tarpaulin na may mukha ng kanyang asawa. Doon ipinaliwanag ng kanyang ina na na-ambush ang kanyang asawa habang pauwi ito. Lumayo si MAYA sa tabi ng kanyang mga magulang at anak. Dahan-dahang tumungo sa kwarto nilang mag-asawa. Marahan nitong hinawakan ang kanilang wedding pictures. Binuksan nito ang drawer, at saka binunot ang nakatagong baril. Itinutok ito sa kanyang ulo nang biglang may pumasok na atlas moth sa kanilang kwarto. Dumapo ito sa kanyang kamay. Ibinaba niya ang baril saka humagulhol. Narinig niya ang iyak ng kanyang anak. Pinunas niya ang kanyang luha, kumalma, lumabas ng kwarto’t kinarga ang anak. Tumungo sya sa may kabaong at pinakilala ang anak sa nakahimlay na asawa. Naroon rin ang atlas moth na dumapo sa balikat ni MAYA.

Tawag nang tawag si JANUS. Sinagot ito ni MAYA. Nakiramay ito. Kinumusta ang anak ni MAYA. Kapag pwede na raw lumabas, dadalaw ito. Sinabi ni MAYA na di na kailangan pa. Ngunit ani ni JANUS, nang araw bago mapatay si GELO, pinuntahan siya nito. Sinabing baog siya. Nagkatutukan sila ng baril. Di raw sana ipuputok ni JANUS ang kanyang baril pero sinabi nitong isusunod ka at ang anak nila, kaya ginawa niya ang sa tingin niyang makakaligtas kay MAYA at sa kanilang anak. Muli, kukunin ni MAYA ang baril.